

Պատմ. գիտ. քեկնածու Մ. Ն. ՀԱՎՈՅԱՆ

Դրեթե հինգ տասնամյակ անցավ մինչև որ հայ պարբերական մամուլը դերազանցապես լրատու լինելուց դարձավ իրական կյանքն արտացոլող և այդ կյանքի վրա ներգործող միջոց։ Սեփական ինքնության հաստատման համար մեր պարբերական հրատարակությունների անցած ուղու վերջնագծում, 1843 թ. մայիսին, Զմյուռնիայում հանգես եկավ «Հայրենասեր» թերթը։

Արդեն 1840 թ. օգոստոսից Զմյուռնիան ուներ իր պարբերականը՝ «Արշալույս արարատյան», որ մեր առաջին ազգային ինքնուրույն թերթն էր։ Երկրորդ թերթի հրատարակությունը շուրջ 5000 հայերից բաղկացած նույն գաղթօջախում և գրեթե միանման ծրագրով հազիվ թե անհրաժեշտություն էր։ Սակայն խնդիրն էլ հենց այն էր, որ «Հայրենասերը» ասպարեզ էր եկել ինչ-որ չափով հակակշռելու «Արշալույս արարատյանին», որի արդեն հրատարակված 140 համարների բովանդակությունը հիմնականում զանազան լուրերն էին։ Նոր ստեղծվող պարբերականը չէր կարող բավարարվել սոսկ լուրերով։ Նա պետք է իր գոյությամբ նշանավորեր առաջընթաց այն քայլը, որ հասարակական անհրաժեշտություն էր՝ դառնար կյանքի, տեղի ունեցող իրադարձությունների վրա ներգործելու միջոց, մարմնավորեր մամուլի դերի նոր ըմբռնումը։ Ավելին. հենց սկզբից «Հայրենասերը» հակում ուներ դառնալու ոչ թե միայն գաղթօջախի, այլ նաև «քանի մը միլիոն հոգիե բաղկացած և երկրագունտին շատ տեղերը ցրված ժողովուրդի մը» թերթը։ Ուստի և, երկու թերթի գոյության իրավունքին անդրադառնալով, բացատրում է «Հայրենասերը»։ Նրանք «բոլոր ազգիսն են և անոր օգտին և համբավուն համար կտպվին»։ Նրանց նպատակն է իրար կապել գաղթօջախները և նպաստել վերացնելու ազգի «ամեն բանի, մանավանդ դարգացման մեջ, ետ» մնալը։ Այս իմաստով զմյուռնահայ երկու թերթերը, «հասարակության արձագանք ըլլալով», լծակիցներ էին, ինչպես հռչակել է «Հայրենասերն» իր ծրագրային հայտարարություն մեջ։

Սակայն իրենց սկզբնավորումով և հիմնադրությամբ զմյուռնահայ երկու թերթերը բնավ միանման չէին և դա որոշիչ դեր խաղաց։ «Արշալույս արարատյանը» անհատական նախաձեռնության արդյունք էր և նրա լիիրավ տերը Գ. Պալազարյանն էր։ «Հայրենասերը» հիմնել էր նորաստեղծ Արագածունյաց ընկերությունը, որի նպատակն էր թերթի հետ միաժամանակ հրատարակել ազգօգուտ գրքեր։ Ընկերությունը թերթի խմբագրությունը հանձնարարել էր Խ. Մելիքսեղումյանցին՝ մի խումբ երիտասարդների գործակցությամբ։ Իսկ դա նշանակում էր, որ «Հայրենասերը» ոչ թե մի անհատի, այլ կոլեկտիվ ջանքերի արդյունք էր և արտահայտելու էր մի խումբ համախոհների կարծիքը։ Հենց այդ էլ պայմանավորում է այն ելակետային տարբերությունը, որ գոյություն ունի երկու թերթերի միջև։ Մասնավորապես հատկանշական է, որ «Հայրենասերի» դիրքորոշումը ի սկզբանե մայր Հայաստանն էր, որին նվիրված

նյութերին նա առանձին բաժին է հատկացրել հենց առաջին համարից: Այդ-
տեղ թերթը հաղորդում է, որ Արարատյան աշխարհը 1828-ից «խաղաղ վի-
ճակի մը մեջ է», իսկ հայրենակիցները բարվոք կյանք են վարում: Բազմաթիվ
նյութերում թերթը շեշտել է ռուսական տիրապետության շնորհիվ հայության
համար ստեղծված առավելությունները: Պատկերացում է տվել ռուս հասա-
րակության մասին, Մ. Թադիագյանի գրառումների տպագրությամբ նկարա-
դրել է զոհված ռուս զինվորների պատվին հուշարձան հիմնելու հանդիսավո-
րությունը, պարբերաբար լուրեր է տպագրել Երևանից, Ալեքսանդրապոլից, Էր-
զրումից: Առանձնապես ուշագրավ է Սեանա կղզու պատմությանը նվիրված
ռուսումնասիրությունը, որ տպագրվել է թերթի երեք համարներում¹: Այդպի-
սով «Հայրենասերը» իր ընթերցողներին ոչ միայն հաղորդակից էր դարձնում
Հայաստանի կյանքին, այլև նրանց կողմնորոշում էր դեպի մայր հայրենիք,
կոչ անում «հայրենյաց կորուսյալ փառքը ուսման միջոցավը վերստին ձեռք
բերել» (№ 105):

1840-ական թթ. առաջին կեսին հրատարակված հայերեն սակավաթիվ
(հաղիվ 5—6) պարբերականների շարքում «Հայրենասերը» հատուկ տեղ ունի
նախ և առաջ իր բարձրացրած ու քննարկած հարցերով: Դրանք ազգի ու գա-
ղութահայության ընդհանրությանը վերաբերող հրատապ հարցեր էին, որոնց
արժարժումը նպաստում էր ազգային զարթոնքին ու առաջադիմությանը, հա-
սարակական մտքի կազմակերպմանն ու զարգացմանը: Իր սուղ և կաշկանդ-
ված հնարավորություններն օգտագործելով՝ թերթը որոշակի նպաստ է բերել
հայոց պատմությանն ու մշակույթին:

«Հայրենասերը» լույս էր ընծավում ծրագրային մի որոշակի պայմանով.
թերթը «զգույշ ըլլալու է տերությանը վերաբերյալ վեճերեն և հեռի պիտոր
ըլլա հավատքի վրա առարկաներեն» (№ 1): Դա նրան հնարավորություն է
տվել հայացքը բեկեռել, այսպես ասած, ներազգային, աշխարհիկ խնդիրների
վրա, որը և պայմանավորված էր Արաբածունյացի ընդհանուր նպատակով:
Ենթևում իր ծրագրից, թերթը հենց անդրանիկ համարում առաջ է քաշում առև-
տուրի և վաճառականության շահավետության հարցը, հորդորում առաջընթացի
հասնել այդ տեսարանով՝ ելակետ ունենալով հայրենասիրությունը: Առևտրի
հետ մեկտեղ, արդեն 3-րդ համարում, նա շեշտում է երկրագործության օգ-
տակարությունը. երկրագործությունը բնության առատ պարգևն է, գրում է
Թերթը և ընդգծում՝ «հիրավի շատ զարմանալու արժանի է այս բանիս վրա
տակավին մեր անհոգությունը»:

Թերթի էջերում առանցքային հարցեր էր հարուցում հատկապես իրա-
տուր էքզիզանը, որին կարելի է դասել հայ առաջին ուշագրավ ժուռնալիստնե-
րի շարքը: «Հայրենասերի» 1843 թ. հուլիսի 16-ի համարում նա հանդես է ե-
կել իր ժամանակի համար շատ արժեքավոր հոդվածով՝ «Հայոց լեզվին վրա»:
Արձագանքելով «Արշալույս արարատյանի» № 130 և № 131-ում նույն վերնա-
գրով լույս տեսած արժեքավոր հոդվածի հեղինակ «Գ. Կ.»-ին², նա պաշտպա-

¹ «Հայրենասեր», 1, 15 և 29 մարտի 1846, № 103—105 (այսուհետև կնշվեն միայն թերթի
համարները՝ տեքստում, փակագծերի մեջ):

² Այս սկզբնատառերով հանդես էր գալիս լուսամիտ վաճառական, թարգմանիչ ու առա-
ջադիպական գործիչ Գրիգոր Կոստանդյանը՝ բնագետ-փիլիսոփա Գալուստ Կոստանդյանի հայրը:
Նրա արժեքավոր հոդվածի մեթոդյա քննություններում հեղինակի ինքնությունը մնում է

նում է հայերենը բարեկամելու, ամենքին հասկանալի դարձնելու, համազգային լեզու մշակելու առաջարկը՝ Որքան էլ դա դժվար է, այնուամենայնիվ, թերթը գտնում է, որ պետք է վերջ տալ տիրող անհոգությանը և միասնաբար լուծել լեզվի խնդիրը, այլ խոսքով՝ քաղաքացիություն տալ աշխարհաբարին։ Խ. Էքիզյանը նկատում է, որ «սակավակիրթ ազգերու մեջ անգամ այսքան անշուք աշխարհաբառ մը չկա» և կոչ է անում այն ճշտելու և կանոնավորելու համար՝ մեկտեղել ուսումնական ընկերությունների, դպրոցների, վանքերի, գիտնականների ջանքերը և ազգի միակամ հավանությանը ամենուր կիրառել աշխարհաբարը։ Երեխան՝ դպրոց հաճախելու առաջին օրվանից, վարժապետը՝ աշակերտի հետ պետք է խոսեն «կանոնավոր աշխարհաբարով», «մաքուր հայերեն»՝ մոռանալով «անճոռնի հայերենը», մանավանդ «գտարազգի բառերը»։ Այսպիսի հարցադրումը, այն էլ գրապայքարը սկսելուց շատ տարիներ առաջ, չափազանց կարևոր է։ Դրանով և հենց աշխարհաբար իր լեզվով «Հայրենասերը» իր նպաստն էր բերում զրական աբեմտահայերենին³։

Աշխարհաբարին քաղաքացիության իրավունք շնորհելու առաջարկը ինքնին համարձակ քայլ էր։ Բայց զմյուռնահայ գաղթօջախում նման խնդրի տառադրումը բնավ խորթ չէր և այդ առթիվ թերթի դեմ հակակրանք չարթնացավ, ինչպես դա տեղի ունեցավ այլուր՝ շատ տարիներ անցնելուց հետո։ Դրան հակառակ «Հայրենասերը» բուն դժգոհություն առաջացրեց, երբ ընդհուպ մոտեցավ վաճառականության խնդիրներին։ «Առևտուրի մեջ իրարու օգնելու վրա» վերնադրով ոչ մեծ հոգվածի հեղինակը դարձյալ Խ. Էքիզյանն էր։ Անմեղ, ընդհանուր դատողություններ պարունակող հոգված է դա։ Եվրոպացիները լավ կարծիքի են հույ վաճառականների մասին. «Ես ալ... կհավաստեմ անոնց ըսածը. բայց մյուս կողմեն ալ կցավիմ տեսնելով, թե անոնց վրա բնավորյալ զանազան պակասությունները պատճառ կըլլան այն գովելի հանգամանքները անպտուղ ձգելու, և ավելի դժբաղդությունը այն է, որ հառաջադիմությանը արգելք ըլլալեն ի դատ շատ երկիրներու մեջ ունեցած դերազանցությունիս ալ պակսեցնելու առիթներն են» (№ 10)։ Խ. Էքիզյանը ցավով նշում է, որ հայ վաճառականներն արդեն զիջում են իրենց առաջնությունը և ետ մնալու «վտանգը օրեօր ավելանում» է։ Ցանկանալով, որ «հիարու գործ դյուրացնելու ազդասիրությունը ամենուն սրտին մեջ տեղ» գտնի, հեղինակը կոչ է անում վաճառականներին միավորվել, համատեղ ուժերով դիմադրել սպասվող սնանկությանը, նկատի ունենալ, որ եթե մի անգամ հալ վաճառականը կորցնի իր վարկը, այլևս չի կարողանա վերականգնել։ Հոգվածը, իհարկե, հրապարակախոսական շնչով է գրված, հարցադրումներում ինչ-որ սրություն կա, մտահոգությունը, որ արտահայտում է հեղինակը, նրա տողերից փոխանցվում է ընթերցողին։ Զգալի է նաև տագնապը հեռանկարի հանդեպ։ Այդքանով հանդերձ Խ. Էքիզյանը հանգես է բերել ակնառու զոռչություն և չի հիշատակել վաճառաշահ Ձմյուռնիայի որևէ վաճառականի և հագիվ

չպարզված (տե՛ս Վ. Ա. Տեմյան, Գրական արևմտահայերենի ձևավորումը, Երևան, 1971, էջ 114, 120 և 137)։ Այս առթիվ տե՛ս «Արշալույս արարատյան», 11 նոյեմբերի 1878 (№ 1105)՝ Գր. Կոստանդյանի հոգվածի վերատպությունը։

³ Հրատարակվելով աշխարհաբար լեզվով, «Հայրենասերը» խուսափում էր թուրքերեն և օտար բառերից, աշխատում էր գործածել ավելի դյուրմբունի լեզու և, ինչպես «Արշալույս արարատյանը», հոգվածներում ու տողատակ բացատրում էր անհասկանալի և հայերենին խորթ բառերն ու արտահայտությունները։

թե կարելի է նրա տողերի արանքում նշմարել որևէ մեկի դիմաստվերը: Այլ կերպ էլ լինել չէր կարող, քանզի հեղինակը հենց վաճառականական դասից էր և արտահայտում էր ոչ միայն ազդեցիկ էքզիզյան գերդաստանի առևտրական, այլև առհասարակ իր դասակարգային շահերը:

Հակառակ այդ ամենի՝ Խ. էքզիզյանի հոդվածը փոթորիկ առաջացրեց ղմյուռնյուղի վաճառականների շրջանում: Սկիզբ առան զանազան ենթադրություններ, հոդվածագրի անհասցե դիտողությունները և վերացական խորհրդաժողովուրդները հասցեագրվեցին որոշ վաճառականների, ոմանք տողամեջ ճանաչեցին իրենց: Ավելի քան մի ամիս հոդվածը քննվում, հոլովվում էր ղմյուռնիահայ համայնքում: Տեղի տալով ընդհանուր դժգոհությանը, ղմյուռնիայի մյուս թերթը՝ Դ. Պալազյանի «Արշալույս արարատյանը», զետեղեց «Յ.»-ի նամակը⁴: Ազդեցիկ է նամակի հեղինակը. նա պահանջում է անմիջապես տպագրել իր բանասիրականը, որ կնքել է անմեղ խորագրով՝ «Առևտուր»: Շատ հին օրերից սկսելով, նա բավական երկարորեն հերքում է «հրապարակական գրողին»՝ Խ. էքզիզյանին, որի գրածներից «մարդուն գլխարկը վեր է թռչում»: Նա պաշտպանում է «երևելի վաճառականներին» և բացեիբաց նկատում, թե նրանց դեմ ասված խոսքը «վտանգավոր հետևանքներ կբերի ըսողին վրա... Մեծ ու երևելի վաճառականներին հրապարակավ քար նետողը, նույն քարեն իր գլուխը թող պահե»: Այդ երևելիներին պետք է միայն փառք տալ. ազգը առաջագիմում է նրանց «ձեռնատվությանմբ ու պաշտպանությանմբ», նրանք են ընկերությունները, դպրոցները, օրագրերը պահում:

Որքան էլ «Հայրենասերը» սկզբունքով մերժում էր «վիճաբանական գրովածները», պարտավորված զգաց զետեղել Խ. էքզիզյանի պատասխան նամակը: Նա էլ է մերժում բանավեճը մամուլում, անօգուտ է համարում նման նյութերը և գտնում է, որ մամուլի համար «ամենեն զվելին բանադատության և վիճաբանական գործիք ըլլալն է»: Ընթերցողին հավատացնելով, որ իր նպատակը սոսկ իր պատիվն պաշտպանելն է, էքզիզյանը մանրամասն հերքում է «Յ.»-ի խորհրդաժողովուրդները: Նա մասնավորապես նկատում է, թե իր միտքը ծուռ ըմբռնող հեղինակը համախոհներ է հավաքել իր շուրջը, «գարշելի դաշինք» է հաստատել և հավատացրել, թե քննադատությունը նրանց հասցեին է ուղղված: Հազիվ թե կարելի է էքզիզյանի՝ այս տրամաբանությանմբ հյուսված պատասխանը բավարար համարել, բայց նա իր նամակի վերջում առաջ է քաշում կարևոր սկզբունք՝ մերժելով ընդդիմախոսի այն պահանջը՝ թե «ով որ կսիրե ազգը, ամեն անգամ և ամեն բանի մեջ առանց այլևայլության գովել պետք է զանի»: Ըստ երևույթին «Հայրենասերի» խմբագիրը ևս գոհ չէր իր երիտասարդ ժողովրդատի պատասխանի պատասխան նամակից: Նա թերթի հենց նույն համարում

⁴ Ենթադրում ենք, թե «Յ.» ծածկանվան տակ հանդես է գալիս Եռուսեփյան վաճառականական գերդաստանի անդամներից մեկը (թերևս Յոսեփ Եռուսեփյանը)՝ նպատակ ունենալով հնարավոր ենթադրություններից պաշտպանել Տրիեստում իրենց վաճառատունը հաստատած, մեծ ազդեցություն ունեցող, Եգիպտոսի առևտրական շահերը ներկայացնող Պողոս Եռուսեփյանին: Դա ակնհայտ է դառնում այն բանից, որ «Արշալույս արարատյանը» № 154-ում նշում է, թե «հիշյալ Յ. աղայի վսեմաշուք ազգականներուն» շնորհիվ են Մեսրոպյան վարժարանում դասավանդվում ֆրանսերեն և անգլերեն լեզուները, թե Խ. էքզիզյանը, նրա եղբայրներն ու ազգականները Եռուսեփյանների «մարդասիրական օգնությանմբ կսորվին» («Արշալույս արարատյան», 3 սեպտեմբերի 1843):

հրապարակել է «չեզոք» մի հոգոված՝ «Հակառակասեր գիտուն մարդու բնավորությանը վրա», որտեղ նման անձնավորությանը համեմատում է «յոթ գլխով հիդրայի» հետ, որի գլուխն անհնար է խոնարհեցնել «ո՛չ հացով և ո՛չ քարով, ո՛չ վարդով և ո՛չ սրով», նրան համադրում է նախաքրիստոնեական «չար մարդո՞ւ» Զոյլիլոսի հետ, որին իր գրվածքների հետ այրեցին հենց Զմյուռնիայում։ Նրա դեմ ուղղված չափածո սատիրան խմբագիրն ըստ էության հասցեագրում էր իր թերթի հակառակորդներին։

Առաջին լուրջ և բացահայտ բանավեճն է դա մեր մամուլում, երբ իրար դեմ հանդես են գալիս երկու հրապարակախոսներ և երկու պարբերականներ՝ թեև շտաբերակված սկզբունքներով, բայց արդեն պարզորոշ ընդդիմախոսություններ։ Զուտ մամուլի պատմության ու հրապարակախոսության ձևերի կիրառման իմաստով հետաքրքրական լինելուց բացի այն ուշագրավ է նաև հակադիր կողմերի երևան գալու առումով. Զմյուռնիայի երկու թերթերում հանդես էր գալիս, այսպես ասած, երիտասարդական և ժերունական մտածողությունը, որ հետագայում պետք է վերածվեր երկու հակադիր կողմերի ճակատային բախման։ Այժմ՝ 1843-ին բախումը տեղի ուներ միմիայն «Հայրենասերի» և «Արշալույս» արարատյանի» միջև, որևէ այլ պարբերական, որ կարող լիներ միջամտել այդ բանավեճին, դեռ չկարճ։ Հակառակ դրան, բանավեճը դուրս եկավ Զմյուռնիայի շրջանակից, ունեցավ որոշ արձագանք, նույնիսկ իր հետևանքով բնորոշ դարձավ հայ մամուլի համար։

Իրենց հերթական համարներում, որ լույս տեսան միաժամանակ՝ սեպտեմբերի 3-ին, երկու պարբերաթերթերը շարունակեցին բանավեճը՝ դիմելով արդեն տարբեր ձևերի։ «Հայրենասերը» հրապարակեց Կ. Պոլսից ստացած մի նամակ՝ «Ն. Մ. Զ.» ստորագրությամբ, հույս ունենալով, թե այն հաճելի կլինի ընթերցողներին և «վիճաբանություն սիրող բանադատներուն ալ՝ իրենց կիրքերը մեղմելու արժանավոր հորդոր մը պիտի ըլլա»։ «Արշալույս» արարատյանը Զմյուռնիայի «հայազգի հրեկիններուն հատուկ ինդերանքը» հարգելով, տպագրեց հենց նրանց պատկառազու ստորագրությունները կրող նամակ՝ երկտող բացատրությամբ հայտնելով, թե «պարտավորվեցանք հրատարակել»։ Միաժամանակ հրապարակված այդ երկու նամակները և նրանց կցված բացատրությունները վավերացնում են երկու թերթերի հակադիր դիրքորոշումը և, որ առավել կարևոր է, գոյություն ունեցող տարբեր մտայնությունը՝ տակավին 1840-ական թթ. սկզբին։ «Հայրենասերի» դիրքը որոշակի է. նրա համար իրեն դիմող հեղինակը «ազգասիրական ոգով» է ղեկավարվում, «ազնվամիտ» է և նրա նամակը շնորհակալությամբ է տպագրում, չի թաքցը-

⁵ Իրենց ընդթող 1843-ին հրատարակվող «Շտեմարան պիտանի գիտելյաց», «Հայտարար գիր լրո» և «Բազմավես» պարբերականները հեռու էին իրական կյանքի առաջադրած հարցերին արձագանքելու խնդրից, հետևապես հեռու մնացին «զմյուռնիական» բանավեճից։ Այլ պարբերականներ այդ և հաջորդ՝ 1844 թ. լույս չէին տեսնում։

⁶ Այլ սկզբնատուներով անշուշտ հանդես էր գալիս Նիկողայոս Զորայանը (1821—1859)։ 1849—1850 թթ. և հետագայում հրատարակած գրքերը նա ստորագրում էր «Ն. Մ. Զ.» կամ «Նիկողոս Մ. Զորայան» (տե՛ս մասնավորապես «Հիսուսի վարուցը համառոտ պատմությունը» և «Վարք Հիսուսի» Կ. Պոլսի հրատարակությունները), իսկ դրանից առաջ «Բազմավեսում»՝ «Մ. Նիկողայոս Զորայան» (տե՛ս «Բազմավես», 1848, № 13), «Արշալույս» արարատյանում՝ «Ն. Մ. Զորայան» (տե՛ս «Արշալույս արարատյան», 15 ապրիլի 1849, № 335)։ Ն. Զորայանն, այսպիսով, հրապարակախոսական իր սկզբնաբայը կատարել է «Հայրենասերում», 1843-ին։

նում, որ նպատակ ունի արժանին հատուցել «բանադատներին»: Մինչդեռ «Արշալույս արարատյանը» հանդես է գալիս «չեզոք» դիրքով, կախժես թե սոսկ տեղի տալով ազդեցիկ համաքաղաքացիներին, ակամա է մասնակցում բանավեճին: Դա Ղ. Պալազարյանի ի սկզբանե որդեգրած տակտիկան էր. սուերևույթ հանդես բերել «օբյեկտիվություն», թերթը վարել անկողմնակալ՝ չեզոք դիրքերից, բայց և ամեն հարցում և ամեն անգամ անցկացնել իր քաղաքականությունը, որ տվյալ դեպքում բխում էր երևելիների շահերից և որը դարձյալ պահպանողականությունն էր:

Հալ հրապարակախոսություն համար առավել կարևոր է երկու հակադիր մտայնության երևան գալը, այն մոտեցումը, որ հանդես են բերում երկու նամակների հեղինակները և երկու թերթերի խմբագիրները՝ հրապարակային բանավեճի նշանակության նկատմամբ: Եթե մի պահ ընդունելու լինենք, որ այդ նամակների նախաձեռնողները գուցե և համապատասխան թերթերի խմբագրություններն էին, ասենք՝ նրանց խմբագիրները, դարձյալ չենք կարող կարևորություն չտալ հայ մամուլի էջերում, այսպես ասած, աշխարհիկ խընդիրների շուրջը ծավալված այդ առաջին բանավեճին⁷: Սկզբունքային նշանակություն ունեւր այն, որ «Հայրենասերի» նամակագիրը լիովին պաշտպանում է թերթի ուղեգիծը: Նրա «վերատեսչին» հղած նամակում «Ն. Մ. Զ.»-ն (Նիկողոս Զորայանը) այսպես է բնութագրում թերթը և նրա հրատարակիչների աշխատանքը. «Օրագիրնիդ շաբթե շաբաթ շնորհակալությամբ կկարգամ... հայրենյաց օգուտը ի վաղուց հետե փափաքներուս կեդրոն ըրած եմ... անխոնջ եռանդովնիդ արժանապես պարագլուխ եղաք հայրենասիրաց և հոմանուն օրագիրդ ալ՝ իբրև դրոշակ մը ազնվահոգի գունդերնուդ և իբրև ջահ մը առաքինի սիրտերը վառելու համար ձեռքդ առիր ու հայրենիքներուդ մեջ թմրած ու պաղած սիրտերը վառելու ու զորացնելու կջանաք» (№ 15): Նամակագիրը «Խորթիքան» համարում է «մոտա» և կոչ է անում հանդես բերել քաջություն, «հաղթել ու իր նստատեղին հասնել», հորդորում է չվհատվել: Իրարից զանադանելով «Խորթիքան ընողներին» և «Ճշմարիտ քննիչներին», նամակի հեղինակը վերջիններին բնութագրում է իբրև «կիրթ ախորժակ, խելք, դատում, անբաւ հմտություն» ունեցող, շատ կարգացած և Արիստիդեսի անկողմնակալությունամբ օժտված անձնավորություններ: Նա ցավում է, որ «լուկ հանդիսատես» է և, Կ. Պոլսում բնակվելով, չի կարող գործակցել խմբագրության հետ, բայց նաև հավաստում է՝ «սիրտերնիս ու միտքերնիս ձեւ վրա է, ամեն մեկ շարժումնիդ մեյմեկ դգացում կուտա սիրտերնուս»⁸: Մամուլի դերի այնպիսի բմ-

7 Թ. Ավդալբեգյանը գտնում է, որ «Ազդարարի» էջերում տարբեր ծածկանուններով հանդես եկող նրա իսկ աշխատակիցների մղած բանավեճը «ժամանակագրական կարգով առաջին բանավեճն է հայ մամուլի տարեգրության մեջ» և այդ հարցին առանձին հոդված է նվիրել (տե՛ս Թ. Ավդալբեգյան, Հայագիտական հետազոտություններ, Երևան, 1969, էջ 250 և «նորք», 1924, գիրք 7): Սակայն հետագա ուսումնասիրությունները ցույց են տալիս, որ տարբեր ծածկանուններով հանդես էր գալիս «Ազդարարի» միևնույն աշխատակիցը՝ հենց ինքը՝ խմբագիր Հ. Շաավոնյանը, որ բանավեճը պարզապես հարմար ձև էր անհրաժեշտ գաղափարները շնչոված ձևով պրոպագանդելու համար, «բանակոլողները արժարծում և պաշտպանում են միօրինակ գաղափարներ» (տե՛ս Ա. Կարինյան, Ակնարկներ հայ պարբերական մամուլի պատմության», հ. 1, Երևան, 1956, էջ 217—225 և հտ.):

8 Նկատենք, որ Ն. Զորայանը տարիներ անց հանդես եկավ մամուլի դերի մասին ընդարձակ ու բանիմաց գաղափարներով և հանգամանորեն բացահայտեց պարբերական հրատարակությունների մեծ դերը ժողովրդի առաջադիմության գործում:

բռնումը, նրա էջերում մղվող բանավեճի նման գնահատությունը և այս համակրանքն ու պաշտպանությունը, որ ցուցաբերում էր ընթերցողը թերթի նրկատմամբ, էական նշանակություն ունեին առաջադիմական մամուլի և համարձակ, հրատապ խնդիրներ առաջադրող ժուռնալիստների համար:

Իսկ ի՞նչ դիրքերից էին հանդես գալիս սրտենդած երևելիները «Արշալույս արարատյանի» ձայնակցությամբ: Նրանք շտապում են խրախուսել «Յ.»-ին, որ պաշտպանում է «իր վսեմափայլ քեռիներուն պատիվը», իսկ Խ. էքիզյանին մեղադրում են «բարեպաշտության, անկեղծության, և որ ամենեն մեծն է՝ երախտագիտության» դեմ մեղանշելու մեջ, կրկնում են նույն ազդու փաստարկը, թե «Հայրենասերի» հողվածագիրը «կթշնաման հայազգի բոլոր զմյուռնիացվոց բարեբարին...», որ տարուց տարի մշտնջենավորապես բավական գումար ստակ կվճարե մեր դպրատան հառաջադիմության համար»⁹: Սակայն մամուլում հանդես եկող նույն երևելիները չէին գոհանում դրանով: Նրանք գտնում էին, որ հարկ էր առհասարակ ժուռնալիստի «լեզվին ու իր ապերախտությանը գոնե քիչ մը շափ գնել», մանավանդ, որ նա կրկին հանդես գալով նախատել է «Յ. մեծաշուք աղային» և դրանով «ալ ավելի իր հանցանքը կծանրացնե»: «Անաշառ» դատաստան պահանջելով, նրանք ցավում են նույնիսկ էքիզյանի գերդաստանի պատվի համար: Ոչ մեծ այդ նամակի տակ շարված է Զմյուռնիայի տարեկան հոգաբարձուներից Յ-ի և «Հայոց հասարակության» երևելիներից Յ7-ի ստորագրությունը, շարքն ավարտվում է «և այլն, և այլն»-ով: Քաղաքի հայտնի մեծատուններից միայն Գրիգոր Կոստանդյանի ստորագրությունն է պակասում այդ ցանկում, որին շուտով ձոներգեր պիտի նվիրվեն «Արշալույս արարատյանում»:

Այսպիսով, նորաստեղծ «Հայրենասերի»՝ սկսած նրա 10-րդ համարից, և երիտասարդ ժուռնալիստ Խ. էքիզյանի դեմ ծառացավ երևելիների գրեթե ամբողջ բանակը՝ «Արշալույս արարատյանի» և նրա խմբագրի վատ քողարկված ղինակցությամբ: Գոտեմարտն անհավասար էր ու հայտնի չափով նաև ճակատագրական: «Հայրենասերի» շուրջն առաջացած աղմուկը նոր թափով ծավալվեց: Թերթի հաջորդ՝ 16-րդ համարի տպագրությունը, տպաքանակի հավիվ քառորդ մասը տպագրվելուց հետո, խափանվեց՝ հավանաբար «ներողամտության» կոչ անող նույն երևելիների ջանքերով: Իզմիրի և մի շարք քաղաքների բաժանորդները չստացան թերթի հերթական համարը, միայն Կ. Պոլսի և Տրեբիստի ընթերցողների մի մասին հնարավոր եղավ ժամանակին առաքել թերթի սեպտեմբերի 10-ի օրինակներից: «Հայրենասերի» հոկտեմբերի 8-ի համարից հայտնի է դառնում, որ սեպտեմբերի ընթացքում՝ «ամիսն մը ավելի», իրար էր անցել ամբողջ գաղթօջախը և գործը հասել է Զմյուռնիայի կառավարիչ Համտի բեյին: Կարելի է ենթադրել, որ թուրք կառավարիչի օգնությամբ են դիմել նույն երևելիները և նա, ինչպես գրում է «Հայրենասերը», «իր խոհական կարգադրությամբ խնամք տարավ հանդարտելու և հասարակության մեջ անզգուշաբար եղած շշուռները խափանելու»:

⁹ «Արշալույս արարատյան», 3 սեպտեմբերի 1843, № 154: Հարգանքի տուրք հատուցելով աղզային բարեբարներին, Ղ. Պալղազարյանը, որ ուներ սեփական ոչ մեծ վաճառատուն, զուտ դասակարգային, իր շահերից ելնելով պետք է որ համերաշխվեր Խ. էքիզյանի հետ, պաշտպաներ մանր առևտրականների շահերը: Տվյալ դեպքում, սակայն, նա մտահոգված էր իր թերթի պահպանությամբ:

Դեպքերն ըստ երևույթին ավելի լուրջ բնույթ էին յտացել, քան կարելի է ենթադրել այդ հաղորդումից: Բորբոքված հասարակությանը խաղաղեցնելուն միջամտեց նաև Զմյուռնիայի հոգևոր առաջնորդ (հետագայում կաթողիկոս) Մատթեոս արքեպիսկոպոսը: Շրջակա հայաբնակ գյուղերում հինգամսյա շրջագայությունից հաղիվ վերադարձած, հոկտեմբերի 15-ի կիրակի օրը նա Ս. Ստեփաննոս եկեղեցում «շատ ազդու քարոզ մը տալով», կոչ արեց երեւելիներին «միաբանությունը վերստին հաստատելու և հասարակության մեջն ալ եղած ալլ և ալլ տարածայնությունները բոլորովին վերջացունելու»:

Հրապարակված նյութերը ավելին չեն հաղորդում գաղթօջախի երեւելիների և հասարակության ներքին բախումների մասին: Տարակույս չի կարող լինել, որ նրանց միջև երևան եկած սուր բնույթի տարածայնությունները սոցիալական հիմք ունեին: Համեմայն դեպս ակնհայտ է, որ պայքարը մղվում էր մի կողմից մամուլի դեմոկրատական իրավունքները հաստատելու, մյուս կողմից՝ այդ մամուլը կաշկանդելու, նույնիսկ խափանելու համար: Որքան էլ իրավացի լինեին «Հայրենասերի» անմեղ գիտողությունները, պարզ է, որ դժբաղ շոշափում էին մեծատունների վարկը, սասանում էին ամիրայական դասի ներկայացուցիչների ավանդաբար վայելած հեղինակությունն ու անքակտելի ազդեցությունը գաղթօջախի բոլոր հասարակական գործերում: Լրագրական, կարելի է ասել, պարզ բանավեճը փաստորեն երևան էր հանել այդ բանավեճի շրջանակից դուրս գոյություն ունեցող հակասությունը ունեոր դասի ու անձեռնմխելի բարերարների և նրանց անվերապահությամբ երկրպագելու պարտքի տակ կբած հասարակության ու նոր-նոր երևան եկող դեմոկրատական հակումների միջև:

Բարեհաջող վախճանով «Հայրենասերը» ուրախ էր, բայց և հարկ համարեց հոկտեմբերի 8-ի համարում էլ ղետեղել երկու փոքրիկ բարոյական զրույցներ՝ բնորոշ վերտառությամբ՝ «Զրպարտություն» և «Անկողմնասիրություն», որոնցում քարոզում էր խոհեմությամբ համբերել և խաղաղություն հաստատել: «Արշալույս արարատյանը», որ երևի դեպքերի ընթացքին անտեղյակ չէր, դարձյալ լռում էր, նույնիսկ կողմնակի ակնարկներ չէր անում տեղի ունեցածի շուրջը: Բայց՝ այդ լռությամբ ու շեղոքությամբ նա ավելին էր ասում. դրանով նա շահում էր առնվազն իր գոյության իրավունքը: Մինչդեռ «Հայրենասերը», ինչպես պարզվում է 1844 թ. մայիսի 6-ին (№ 26) լույս տեսած համարից, որտեղ ոչ մեծ ծանուցում է ղետեղված թերթի տարելիցի մասին, «հինգ ամսի չափ»՝ 1843 թ. հոկտեմբերի կեսից մինչև 1844 թ. ապրիլի կեսը, խափանվել էր: Զպարզելով խափանման պատճառները, թերթն ընթերցողներին սփոփում էր նրանով, որ նրանց բաժանորդագրության ժամկետը հինգ ամսով երկարաձգվում է, որով կհատուցվի չստացված համարների դիմաց: Ինքնին պարզ է. երեւելիները հասել էին իրենց նպատակին՝ դեմոկրատական «Հայրենասերը» նրանց ջանքերով պատժվել էր¹⁰:

¹⁰ Ի դեպ, ինչպես նշվում է մի ուսումնասիրության մեջ, առաջին բանավեճը թուրքական մամուլի էջերում տեղի է ունեցել 1860 թ. վերջերին, իսկ 1860-ական թթ. սկզբներին հալածանքների են ենթարկվել խմբագիրներն ու թուրքական մամուլի առանձին օրգաններն (տե՛ս Ա. Դ. Желтяков, Печать в общественно-политической и культурной жизни Турции (1729—1908 гг.), М., 1972, стр. 72, 78 и сл.).

Այդպիսի վախճան ունեցավ հայ մամուլի էջերում մղված առաջին բացա-
հայտ բանավեճը, այն բախումը, որ առաջացավ պահպանողական «Արշա-
լույս արարատյանի» և նոր-նոր երևան եկող դեմոկրատիայի օրգանի՝ երի-
տասարդական «Հայրենասերի» միջև:

Լրագրական այդ բախումից, սակայն, չի կարելի հետևություն անել, թե
«Հայրենասերը» առհասարակ հակադրվելու հակում ունեյր, թե նա ձգտում էր
նսեմացնել «մրցակից» «Արշալույս արարատյանին»: Ընդհակառակը, «Հայ-
րենասերը» և նրա խմբագիրը ամեն կերպ ձգտում էին դրացիական կապ պահ-
պանել «Արշալույս արարատյանի» հետ, ինչպես հակված էին ի սկզբունք և
ինչպես այդ մասին ազդարարված էր թերթի առաջին իսկ հոդվածներում (№ 2)
և ընկերության հայտարարության մեջ (№ 5): Վերոհիշյալ բանավեճի հետե-
վանքով, անշուշտ, սրվել են նրանց հարաբերությունները: Եվ դա այնքան
ակնառու էր, որ շատ տարիներ անց՝ 1861-ին, սուր բանակոխվ մղելով «Ար-
շալույս արարատյանի» դեմ, «Մեղուն» ընթերցողներին հիշեցնում էր «ազա-
տամիտ և Մելիք Սելումոֆի» հրապարակած «Հայրենասերի» մասին՝ գտնե-
լով, որ այն դարձավ «բռնաբարության զոհ»¹¹: Բայց երկու թերթերի բավա-
րար հարաբերությանը խանգարում էին ավելի շատ ինչ-որ «ոսոխներ», որոնց
մասին ակնարկում է «Հայրենասերը»: Երբ թերթի 30-րդ համարի 117 օրինակը
չհասավ Կ. Պոլսի բաժանորդներին ու ենթադրվում էր, թե կապոցը «անխիղճ
ժանյաց որս եղեր է», Զմյուռնիայում լուրեր տարածվեցին, թե այդ ակնարկը
վերաբերում է «Արշալույս արարատյանի» խմբագիր Ղ. Պալազարյանին:
Անհայտացած կապոցը գտնվելուց մեկուկես ամիս առաջ «Հայրենասերը»
հերքեց այդ լուրերը և գրեց, որ «սիրո կապը»¹² իր և «Արշալույս արարատյա-
նի» միջև վերականգնված է (№ 35):

Ամեն կերպ ձգտելով տարածայնությունների տեղիք չտալ, «Հայրենասե-
րը», սակայն, չէր ընթանում այն ուղիով, որ արդեն ավանդական էր դառնում
«Արշալույս արարատյանի» համար: Ինքնուրույն ուղեգիծ վարելու «Հայրենա-
սերի» տակտիկական առավել ակնհայտ է դառնում, երբ հետևում ենք նրա հար-
ցադրումներին մի շարք էական խնդիրների շուրջը: 1844 թ. օգոստոսի 19-ի
համարում թերթը հատուկ անդրադարձել է «երգիծաբանությանը» և մատնա-
նշելով, որ մեզանում դեռ երգիծական «ընտիր ու երկար գործ մը դուրս եկած
չէ», առաջ է քաշում ժանրի զարգացման անհրաժեշտության հարցը, տպա-
գրում է որոշ նմուշներ (№ 41): Զմյուռնիայի հունական մի դպրոցի վերաշի-

11 «Մեղուն», 20 մարտի 1861, № 128, էջ 71—76:

12 «Սիրո կապը» վերականգնման տակ պետք է հասկանալ երկու թերթերի միմյանց չհա-
կադրվելը: Այդպիսի համերաշխությունը, սակայն, չէր խանգարում, որ «Հայրենասերը» երբեմն
փաստական ուղղումներ մտցներ «Արշալույս արարատյանի» հրատարակած նյութերում, հա-
կադրվեր նրան, ճշգրտեր առանձին վրիպումներ, Հետաքրքրական է, օրինակ, հետևյալ ճշգրտու-
մը: Հենվելով «Արշալույս արարատյանի» հրատարակած հոդվածի վրա, «Հայրենասերը» հա-
ղորդում է տպագրել այն մասին, թե Երուսաղեմ և Կ. Պոլսի է այցելել «բարեհամբավ աղա
Գրիգոր Այվազովսկին», որը խոստացել է վերաբացվելիք Իսկուտարի ճեմարանին հատկաց-
նել 100.000 ղուրուշ մայր գումար: Մոտ մեկ ամիս անց թերթը ուղղում է, որ ռուսաց կայսերոր-
դու հետ Կ. Պոլսի, ապա և Զմյուռնիա է այցելել ոչ թե Գրիգոր Այվազովսկին, այլ «հույակա-
վոր պատկերահան» Հովհաննես Այվազովսկին: «Արշալույս արարատյանը», որ իր ընթերցող-
ներին առաջներում պատմել էր Հովհ. Այվազովսկու մասին, ուղղում չի տվել: Մեծ ծովանկարչի
հետ կապված այս փաստերը, որ վկայում են զաղթաշխարհի հետ նրա ունեցած շփումների
մասին, արժանի են նկարչի կենսագիրների ուշադրությանը:

նության առիթով «Հայրենասերը» փաստորեն հարուցում է կրթական գործի վերակառուցման, դպրոցը դիտական-ուսումնական իսկական օջախ դարձնելու հանդուցային խնդիրը: Հոռական թերթից արտատպված հոդվածում այսպես է դրվում հարցը. «Սոսկ շինվածով կկատարելագործի՞ արդյոք մեր այս գործը», չորս պատերը կծառայե՞ն սովորողների «մտածությանց պաշարը պատրաստելու, ո՛չ արդարև»: Հարկավոր են դաստիարակներ, վարժապետներ, ուսուցիչներ: Զոր քերականություն ուսուցելը քիչ է: Դպրոցը պետք է ունենա «քաջագետ մաթեմատիկոս մը, բնական գիտությունց դասատու մը, դոնն մեկ ալ եվրոպական լեզվագետ մը» և այլ առարկաների դասատուներ: Դրա համար անհրաժեշտ է ստեղծել հոգաբարձություն, որ իր ձեռքը վերցնի ուսման ու դաստիարակության գործը (№ 51):

Անշուշտ ինքնանպատակ չէ Մարկոս Ավրելիոսի հանրահայտ նամակներից մեկի տպագրությունը «Հայրենասերի» սեպտեմբերի 4-ի համարում. կախաղան են հանվում անմեղները, իսկ նրանց մահվան դատապարտողներն ավազակներ են: Բռնատեր հռոմեացիներին ներկայացվող պահանջները համահնչուն են արևմտահայության այնօրյա պահանջներին՝ «կամ մեր պահանջմունքը և իրավունքը սահմանեք, կամ մեր կյանքը մեզմե վերցնեք, որպեսզի ազատինք», և ապա՝ «ճշմարտախոսությունը արգելել օրենք չէ» (№ 52): Նույնպիսի այլաբանություններ կան նաև թերթի մի շարք հրապարակումներում:

Կարևոր է ընկերություններ հիմնելու (Ֆրանսիայի օրինակին հետևելով) և այդ առթիվ Զմյուռնիայի Սյունյաց ընկերության գործունեությունը ծավալելու, ինչպես և աղքատների նկատմամբ խնամք տանելու համար հատուկ ընկերություն ստեղծելու մասին «Հայրենասերի» սկզբունքային առաջարկությունը (№№ 70, 76): Դարձյալ ֆրանսիական առաջավոր մեթոդների օրինակով, «Հայրենասերն» արծարծել է «ուսումնականության և վաճառականության» զարգացման խնդիրները, առաջ է քաշել կանանց կրթության հարցը (№ 73): Առավել նպատակասլաց ու հրատապ են այն խնդիրները, որ քննել է թերթը «Ցոյց ազգասիրության» անստորագիր, բայց իս. Մելիքսեղումյանցին պատկանող հոդվածում (№ 96): Գաղթօջախի հասարակական կյանքի ու կարծիքի կազմակերպման նպատակ հետապնդելով՝ «Հայրենասերն» այդ հոդվածում սկզբունքային հարց է առաջ քաշում՝ ունենալ սեփական կարծիք, հանդես բերել ինքնուրույն մտածում, դեկավարվել «ո՛չ կուրորեն նախապաշարմունքով... և ո՛չ ալ՝ տղայական փոփոխամտություն գերի» դառնալով: Դրանով նա ըստ էության վերադառնում և պաշտպանում էր 1843-ին Ն. Զորայանի առաջ քաշած սկզբունքը՝ «մեկ բանը չի դատած՝ չեն քններ, նախ կդատեն՝ հետք կքնեն և հետևաբար... կսխալին...» (№ 15): «Իմ խոսքս ըլլա» սկզբունքով բռնավորները սլառակտում են աղզը, ոգևորում նրա «ներքին և արտաքին թշնամիներին»: Երկպառակությունը և անմիաբանությունը վերջին հաշվով վնասում է աղզի «հառաջադիմությունն ու պայծառությունը»: Իր գաղափարն ավելի շոշափելի դարձնելու համար Մելիքսեղումյանցը պատմում է այն մասին, թե ինչպես է վարվում խորտակվող նավի նավապետը. նա իր ձեռքն է վերցնում դեկը, նույնիսկ զոհում է թանկարժեք ապրանքները՝ առաջին հերթին ծով նետելով «իր անձին հարկավոր խոհանոցը... որպեսզի չուտել ու չխմել», մինչև նավը չազատի ալեկոծությունից, «քաղցր բանիվ» խրախուսում, քաջալերում է ամենավերջին նավաստուն անգամ: Այդպես նա իր նավը՝ նա-

վաստիներով, և հենց իրեն ազատում, հասցնում է «ցանկալի նավահանգիստը»: Ահա թե ինչպես է այնուհետև գրում «Հայրենասերը»՝ խոսքն ուղղելով ազգին ու ազգապետերին. «Եվ ո՞վ չգիտեր, թե տարվոյս եղանակներուն ընթացքը միշտ փոփոխվելու վրա են, և ոչ մեկը շարունակաբար կրնան տիրել աշխարհիս վրա: Դժվարավաստակ ձմեռը կանցնի, ետեն ցանկալի գարունը անուշահոտ ծաղիկներով հառաջ կուգա, որուն ետեն զվարճալի աշունը տիրելով՝ կճոխացուցանե կերպ-կերպ բերքերով ու կզովացնե առատ անձրևներով. ուստի հայտնի է՝ թե որ մարդս այն պատվական եղանակներուն մեջ պետք եղած նախապատրաստությունը հոգա նե, ետքը ձմեռը նորեն վրա գալուն անդամ՝ անոր խստությունը կրնա տոկալ ու ավելի ալ չի խռովիր: Վերջապես երջանիկ է այն ազգը, որոնց մեջ իմաստուն անձիքներ միշտ պակաս չեն և գիտեն ինչևիցե դիպվածի մը մեջ խոհեմությամբ կառավարել հասարակությունը, ամենևին ականջ չի դնելով թե՛ նեղքին ու թե՛ արտաքին թշնամյաց զրպարտություններուն»: Ազգը, խորհրդածում է «Հայրենասերի» խմբագիրը, «հմուտ բժշկի մը կկարոտի», որովհետև եթե շտապ խնամք չտարվի, նա կամ կդատապարտվի տարածամ մահվան կամ «դժվարաբուժելի ախտից գերի ըլլալով, միշտ կտանջվի»: Հատկանշական է, որ թերթում այդ խորհրդածությունները երևան եկան հենց գաղթօջախի նոր հոգևոր առաջնորդի ժամանման նախօրերին:

«Հայրենասերի» էջերում հրատապ հարցերի բարձրացմանը մեծապես նպաստում էր նաև թերթի Կ. Պոլսի գործակալ Մկրտիչ Աղաթոնյանը (1820—1890): Հրապարակալին առաջին քայլերն անելով, նա հաճախ էր նամակներ, թղթակցություններ հրատարակում թերթում, օգտվում էր խմբագրի վստահությունից, իր ազդեցությամբ նպաստ էր բերում «Հայրենասերի» տարածմանը: Թերթում հրատարակված իր առաջին ատենախոսությունում նա շեշտը դնում է «ճշմարիտ հայրենասիրական ոգու» վրա և ընդգծում, որ «հայրենյաց և ազգին սիրուն» յուրաքանչյուրը պետք է նվիրի այն, ինչ ունի՝ «թե որ ուսումնական ենք՝ սովորածնիս, թե որ առաքինի ենք՝ առաքինություններնիս, թե որ հարուստ ենք՝ հարստություններնիս»: Ի դեպ, նրա կողմից հետևելով հայտնի բժիշկ և մտածող Ան. Փոփոմիչը խոստանում էր ձրիաբար սպասաբեկել Կ. Պոլսի նասպուղի դպրոցի սաներին: Հատկապես պետք է շեշտել, որ Մ. Աղաթոնյանը «Հայրենասերում» հրատարակված իր անդրանիկ հոդվածներից մեկում բարձրացրել է ժամանակաշրջանի հայ իրականության համար հանգուցային այն հարցը, որ անհրաժեշտ է լուսավորված ազգերի օրինակով հաղթահարել կրոնական դավանանքի տարբերությունները և վերջ տալ ազգը ջլատող տարածայնություններին: Նա առաջինն է, որ մամուլում հռչակեց կրոնը և ազգը իրար հետ շփոթելու սկզբունքը, բանաձևելով՝ «Այլ է կրոնք, այլ է ազգը», սկզբունք, որ մի քանի տասնամյակ պաշտպանվում ու արժարժվում էր հայ դեմոկրատական մամուլի էջերում, մասնավորապես Ստ. Ոսկանյանի և Մ. Նալբանդյանի հրապարակախոսական հոդվածներում:

Հայ հետագու մամուլի համար արմատական նշանակություն ստացավ նաև սկզբնապես «Հայրենասերում» բարձրացված մի սկզբունքային հարց: Դարձյալ այլաբանական ենթատեքստով գրված մի հոդվածում թերթը համարում պատշաճի պատմում է այն մասին, որ եվրոպական երկրները, «մանավանդ Ֆրանսիան, բարեկարգությամբ կպարծենան»: Սակայն այդ երկրները ունեն նաև թերություններ և, ընդգծում է «Հայրենասերը», «օրագիրներն ալ

չեն լուր անոնց վրայոք իրենց պարտավորությունը դործի դնելու, այսինքն կսկսին իրենց ազգին ու հայրենիքներուն մեջ մտած ու շատցած անկարգութիւնը անաշտապես հրատարակելու: Եվրոպական երկրներում իրենց ազգային պակասութիւնները բացահայտողները, հատուկ նշում է թերթը, ոչ թե թեթեամտորեն «հայրենատյաց կհամարվին, այլ ընդհակառակը՝ ճշմարիտ հայրենասեր»: Մեկը, ով ուղում է լինի, եթե միայն փառաբանում է ձեռք բերված առաջադիմությունը, նախնիների քաջության «ու հին ավերակներովը կպարծենա նե, անոք ազգասեր չըսվիր», քանզի ամեն ազգ էլ ունի նաև իր «պարսպվելու բաները»: «Ուստի ազգասեր անձը, երբ որ հարկը կպահանջե», պետք է, անշուշտ, ցույց տա ազգային առաջադիմությունը, «բայց և այնպես ալ իր ազգին մեջ դժբաղդաբար սպրդյալ գեշ սովորություններուն վրայոք անգամ չի լուր, կարճ խոսքով՝ առաջինը պարտք կսեպե ընել և մեկայն ալ թող չի տար» (№ 93)¹³: Այսպիսով, առաջ քաշելով ազգային թերություններն ու պակասությունները հրապարակայնորեն քննադատելու հրատապ հարցը, «Հայրենասերը» եվրոպական մամուլի օրինակի հիման վրա պաշտպանում էր հայ մամուլի իրավունքի դեմոկրատական սկզբունքը՝ հանդես գալ կյանքի և իրականության խոցերի բացահայտմամբ, հրապարակախոսական միջամտությունով նպաստել դրանց վերացմանը: «Ահա այսպես գիտեն,— գրում է անստորագիր հոդվածի հեղինակը՝ Խ. Մելիքսեւումյանցը¹⁴,— Եվրոպայի խել մը օրագիրները իրենց ազգին ու հայրենիքին վրայոք անկեղծաբար շարժիլ», ապա շեշտում անհատական օրինակի մեծ նշանակությունը, արձանագրում, որ «գործը՝ խոսքեն ավելի ազդու է»: Տեղն ու տեղն էլ Մելիքսեւումյանցը քննադատում է խաղամոլությունը՝ «գեշ սովորություն», որ մեծ տարածում ունի:

Շուտով դադարելու հետևանքով «Հայրենասերն» ի վիճակի չեղավ գործնական հողի վրա դնել իր ծրագրային հարցադրումը: Տարիներ հետո, սակայն, այդ սկզբունքը դարձավ հայ առաջադիմական-դեմոկրատական մամուլի ելակետը, իսկ Ստ. Ոսկանյանը, որ հավանաբար «Հայրենասերի» ակտիվ ընթերցողներից էր, և Հ. Սըվաճյանն ու Մ. Նալբանդյանը հրապարակախոսական

¹³ Վերը բերված քաղվածքի մեր ընդգծած արտահայտությունը՝ «ճշմարիտ հայրենասեր», բոլոր երևույթին արժանի է հատուկ ուշադրության: Ակադեմիկոս Ա. Կարինյանն առիթով նկատել է, թե «ճշմարիտ հայրենասեր» տերմինը առաջին անգամ ժողովրդականացրել է հայ մամուլի մեջ Տերոյենցը, ջանալով ընդգծել հայրենասիրության սերտ կապակցությունը կրոնի, եկեղեցու, օրենքի, պետության հետ: Դա կարևոր փաստ է» («Բանբեր Հայաստանի արխիվներ», 1977, № 3, էջ 190): Զանդրադառնալով ընդգծվող արտահայտության մեկնությանը, նկատենք, որ այն հանդիպում է «Հայրենասերի» էջերում 1845 թ. ապրիլի և սեպտեմբերի համարներում, մինչդեռ Տերոյենց-Չամուռյանն այն սկսում է գործածել տարիներ հետո՝ 1850-ից՝ «Հայաստան» (1846—1852) թերթում: Ըստ որում համադրելով «ճշմարիտ ազգասեր» արտահայտությունը հանդիպում է «Արշալույս արարատյանի» 1843 թ. համարներում: Հավանաբար արտահայտությունը փոխ է առնված ժամանակի ֆրանսիական մամուլից:

¹⁴ «Հայրենասերում» տպագրված մի հոդվածի արձագանքներին անդրադառնալով, նրա «վերադարձումը» (խմբագիր) Խ. Մելիքսեւումյանցը տեղեկացրել է ընթերցողներին, որ նրա հեղինակը ինքն է, ապա և ավելացրել, որ այն բանասիրականները, «որոնց տակը ստորագրություն և կնիքներով զրկված չեն նե, հայտնի է, որ անոնք օրագրոյս վերադարձին տկար մտացը աշխատությունն է» («Հայրենասեր», 7 դեկտեմբերի 1845, № 97): Ուստի և վերոհիշյալ, ինչպես և մի շարք անստորագիր հոդվածների հեղինակը համարում ենք Խ. Մելիքսեւումյանցին:

լայն գործունեություն ծավալելով, մամուլը դարձրին իրոք մարտական զենք։ Նրանց համար կայուն սկզբունք էր այն, որ մամուլի և հրապարակախոսության ազգասիրական ու հայրենասիրական պարտքն է բացահայտել ազգային պակասությունները և ցույց տալ դրանց վերացման միջոցները։

«Հայրենասերի» երիտասարդ խմբագիրներն ու ժուռնալիստները տվել են նաև լավագույն օրինակն այն բանի, թե ինչպես պետք է տպագիր օրգանը կիսի այն ժողովրդի ծանր ճակատագիրը, որի համար նա հրատարակվում է, կանգնի աղետի ենթարկված ու հուսալքության մատնված իր ընթերցողների կողքին։

1845 թ. հունիսի 20-ին լույս տեսավ «Հայրենասերի» 84-րդ համարը։ Հաջորդ օրը բռնկած հրդեհը լափեց ամբողջ գաղթօջախը։ Շուրջ հինգ հազար հայեր մնացին անտուն ու անտեր, մերկ ու անոթի։ Հաղիվ փրկվեցին 30-ի շափ տուն, Մեսրոպյան վարժարանը և հիվանդանոցը։ Մնացած ամեն ինչ հրո ճարակ դարձավ, այդ թվում՝ «ազգիս բոլոր տները... մանավանդ Ս. Ստեփաննոս եկեղեցին», Արագածոտնյացի տպարանը, բոլոր իսանուկ-վաճառատները։ Հայությանը պատճառված վնասը կազմում էր ավելի քան 50 միլիոն դահեկան։ Թերթի հրատարակման հերթական օրը՝ հունիսի 29-ին, «Հայրենասերը» լույս տեսավ երկէջյա՝ իբրև «հավելված ցավոց ազգասեր հոգվոց»։ Աղետի նկարագրությունը, նույնիսկ ողբը բնական էր. «Անտանելի է պատահարս... անվտանգ մը չի մնաց, որ վտանգավորները մխիթարե, ամենքն ալ գրեթե առանց մխիթարության. ահա քաղաք մեր հրձիկք՝ տունք մեր ավերակք և յոտից մինչև ի գլուխ անվնաս ոք չմնաց»։ Հաղորդումներ տպագրելով այն մասին, թե ինչ քայլեր են արվում համատարած աղետն ամոքելու համար, թերթը շուտով գտավ այն խոսքը, որով նման իրադրության մեջ ընթերցողին պետք է դիմեր իր դերը լավագույնս ըմբռնող ամեն մի տպագիր օրգան։ «Բայց հերիք է,— զմյուռնիահայությանն է դիմում «Հայրենասերը»,— որ մենք ամենքս ալ սրտապնդինք և տեղի չտանք երբեք թուլասրտության, որ տիրե մեր վրա և առաջինեն ավելի ազգասիրական և ուսումնասիրական հռաչակով վառվինք... քաջալերության գոտին մեջքերնիս կապելով իրարու ձեռն կալելու և մխիթարիչ ըլլալովնիս՝ քիչ ժամանակի մը մեջ աստուծով կհաղթենք այս ձախող արկածիս» (№ 87)։

Թերթը փորձում էր սատար կանգնել գաղթօջախի հույությանը։ Բայց մեծ աջակցության կարոտ էին Արագածոտնյաց ընկերությունը, «Հայրենասեր» թերթը, որ սկսեց հրատարակվել երկշաբաթյա պարբերականությամբ. նրանց գոյության, այսպես ասած, նյութական բազան՝ տպարանը, հրո ճարակ էր դարձել։ Այդ աջակցությունը նրանք չստացան։ 1845-ից դադարեց Արագածոտնյացը՝ այդպես էլ չկարողանալով կատարել իր փափագը՝ գրքեր տպել¹⁵։

15 Արագածոտնյաց ընկերության հրատարակչական գործունեությունը սահմանափակվել է երկու՝ Արեւ Արարատյանի «Համառոտություն ազգասիրական սխրագործությանց տեառն ներսեսի... համե տեառն 1808 ցամ տեառն 1843» (Զմյուռնիա, 1843) և Հովհաննես Չամուռճյանի «Հայտարար ուղղության...» հայտատու թուրքերեն (Զմյուռնիա, 1845, հ. 1) հրատարակություններով։ Արարատյանի գիրքը նախապես թերթոններով հրատարակվել է «Հայրենասերի» էջերում (№ 17 և 18)։ Հովհ. Տերոյենց-Չամուռճյանը սկսել է «Հայրենասերում» հանգես գալ 1844-ի հունիսից (№ 33) և աշխատակցել է մինչև թերթի դադարելը՝ տպագրելով ինքնուրույն և թարգմանական բանասիրականներ, չափածո ստեղծագործություններ, հանգես էր գալիս «Յ. Պ. 2.», «Յովհ. Պրոս. Տ. Կարապետյան-Չամուռճյան» ստորագրություններով։ Հիմնական-

Նրա առավել մնայուն հետքը «Հայրենասեր» թերթը եղավ, որ գոյություն ունեցավ երեք տարի՝ 1843 թ. սեպտեմբերի 28-ից առ 1846 թ. սեպտեմբերի 10-ը՝ շուրջ հինգամսյա ընդհատումով, լույս տեսնելով 108 համար¹⁶:

Հայ առաջադիմական-դեմոկրատական մամուլի պատմության մայրուղում «Հայրենասերը» սկզբնավորեց այն ուղին, որով ընթացող պարբերականներն ավելի ճիշտ էին ըմբռնում և իրագործում իրենց խնդիրները, ավելի մոտ էին ժողովրդին և աշխատում էին սատար լինել նրա գոյատևմանն ու պայքարին: «Հայրենասերի» դադարումով, բարեբախտաբար, այդ ուղին չընդհատվեց: Մ. Թադևոսյանը Կալկաթայում, 1845 թ. օգոստոսի կեսից սկսեց հրատարակել «Աղգասերը», իսկ 1851 թ. սեպտեմբերի կեսից՝ «Աղգասեր արարատյանը», որոնք հաջորդաբար տեղեկին մինչև 1852 թ. հուլիսը՝ առաջադիմական-դեմոկրատական հայ մամուլի էստաֆետը փոխանցելով հաջորդներին («Բանասեր», Մադրաս, 1848—1849, «Հայրենասեր», Նիկոմիդիա, 1850—1853, «Արծմի Վասպուրական», Կ. Պոլիս, 1855—1863, «Արևելք», Փարիզ, 1855—1856, «Մեղու», Կ. Պոլիս, 1856—1871, «Հյուսիսսահյալ», Մոսկվա, 1858—1864 և այլն): Մաքառումներ, հալածանք, պայքար՝ այդպիսին էր այդ ուղին, որի առաջին փորձությունները վիճակվեցին «Հայրենասերին»:

ИЗМИРСКАЯ ГАЗЕТА «АЙРЕНАСЕР» (1843—1846 гг.)

Кандидат историч. наук М. Н. АКОПЯН

(Резюме)

В первый период своего существования армянская печать ограничивалась преимущественно публикацией разнообразной информации. Лишь в 40-е годы прошлого века появляется тенденция к занятию активной позиции, стремление своим вмешательством воздействовать на ход событий, решать конкретные вопросы. К этому времени и относится зарождение активной армянской публицистики. Газета «Айренасер» («Патриот»), издававшаяся в Измире в 1843—1846 гг., по своему характеру и активной позиции была первым печатным органом, на страницах которого молодые журналисты Х. Меликселумянц, Х. Экизян, Н. Зораян, М. Агатонян и др. старались развернуть критику недостатков социально-культурной жизни измирской армянской колонии, проявляя демократические тенденции. Газета подверглась гонениям со стороны богачей (амира), а затем была запрещена на пять месяцев. Однако «Айренасер» сохранил критический дух и внес весомый вклад в армянскую публицистику.

նում նա հրատարակում էր հետաքրքրությամբ ընթերցվելիք նյութեր (օղապարիկի, արդարասիրության, բարերարության, օգորենութաբանության, նկարչության, տարրեր ցեղերի սովորությունների շուրջը և այլն):

¹⁶ «Հայրենասերի» խմբագիր Խ. Մելիքսելումյանը թերթի հրատարակությունը ստանձնել էր երկու տարի ժամկետով: Սակայն 1846 թ. կեսերին նա Կ. Պոլսում զբաղվում էր թերթի հրատարակության դրժեքով, ինչպես դա պարզվում է «Արշալույս արարատյանում» (14 հունիսի 1846, № 261) հրատարակած նրա նամակից: Նրա ջանքերը հաջողությամբ չեն պսակվել: Հետագայում «Հայրենասերի» խմբագիրը կամ վերականգնել է թերթի տպարանը, կամ էլ նորը հիմնել և փորձել է զբաղվել հրատարակությամբ, սակայն առաջին հրատարակություններից հետո, որոնց վրա դրոշմված է տպարանատիրոջ՝ Խ. Մելիքսելումյանցի ազգանունը, դադարեցրել է: